

四庫全書

史部

欽定四庫全書

史部

雲南通志卷二十九之六

詳校官給事中臣李臺

刑部郎中臣許兆椿覆勘

總校官知縣臣楊懋珩

校對官中書臣張曾炳

謄錄監生臣安宇樂

欽定四庫全書

雲南通志卷二十九之六

奏疏

本朝三

修濬海口六河疏

鄂爾泰

為報明修濬海口大修六河竝請定章程酌留需費以興水利以濟民生事竊以雲南省會向稱山富水饒而耕於山者不富濱於水者不饒則以水

利之未講或講之而未盡其致斯不能受山水之利而徒以增其害也故籌水利莫急於滇而籌滇之水利莫急於滇池之海口其上流為昆明呈貢晉寧昆陽四州縣下流為安寧富民二州縣一水所經為六州縣所係疏通則均受其利壅遏則均受其害故於滇最急滇池之源來於北城之盤龍江經城之東而流於南會呈貢晉寧之水瀦而為池折而西流至昆陽州界復北折而倒流由石龍

壩至於安寧富民之北而入於金沙江此滇池之
形勢也滇池即昆明池土人名之為海海之大周
圍三百餘里環海之田資以灌溉號為膏腴者無
慮數百萬頃每五六月雨水暴漲海不能容所恃
以宣洩者唯海口一河而兩岸羣山諸箐沙石齊
下沖入海中填塞壅淤宣瀉不及則沿海田禾半
遭淹沒明弘治時巡撫陳金開渠濬沙築壩鑿石
民困以甦自此遂有歲修大修之例而不知海口

之內有牛舌灘洲二處梗塞其中致海口內外不能通暢萬厯初復興修作亦只於牛舌洲之左豹子山之下竭力疏濬其根未清故其患未息至今歲修歲壅殊非長策臣委令糧儲水利道黃士傑親往查勘令將海口河道溯源窮流逐一修濬務期利興害除毋為苟且補苴之計嗣據黃士傑回報勘得海口一河南北兩面皆山俱有箐水入河每雨水暴漲沙石沖積而受水處河身平行易於

壅淤如北有白塔臘龍二箐水合瀉入河名洱宗
開壅淤之患猶小南有瓦泥箐邢家園二水屬呈
貢縣轄名普安間有羅武箐一水屬晉寧州轄名
清水間有天自芭蕉二箐水屬昆明縣轄名新村
大開皆直瀉河中每疏濬於農隙之時旋壅塞於
雨水之後不窆則淹沒堪虞開窆則人工徒費沿
海人民時遭水患皆甚苦之行至平定哨一閘係
雲龍箐水歸河之道正值水陡流急之處相度形

勢諮詢輿情咸稱閘南宜開子河一道引普安清水新村等閘諸水同至平定哨閘入河則泥沙石子不能停住一勞可以永遠復行至海口駕船循視見有舊埂一條沉埋橫塞其中埂外龍王廟前有牛舌灘又側而下有牛舌洲俱阻攔出水不能直洩詢諸土人此從前築埂以濬海口之遺基也其一灘一洲自古所有原未議修隨於大海近崖處用竹竿試探水深八九尺出海口外於龍王廟

左海門村試探水僅深二尺五寸於龍王廟右近
豹子山之牛舌洲試探水則止深九寸皆因三重
壅塞不能暢達以阻海口出水之咽喉因令各為
丈量牛舌灘長五十七丈上廣十丈中廣十六丈
下廣九丈頂高一丈牛舌洲長五十八丈上廣九
丈中廣十三丈下廣九丈頂高一丈二尺應將此
一灘一洲并前一埂盡行挖去則海口疏通沿海
田地自無淹沒之虞等情臣復博訪確查即分委

昆明呈貢晉寧昆陽等四州縣照議督修其所用
人夫即令四州縣按名發給口糧并鹽菜等項雖
佚道使民歡欣不怨而急公往役體恤宜優於是
各州縣人民皆踴躍從事於雍正七八兩年農隙
之時興工所有海口河道洱宗普安清水新村等
閘壅淤處所悉已疏濬所有老埂牛舌灘牛舌洲
等處盡行挖出悉已寬深所有平定哨閘南新開
子河一道悉已修通復因晉寧舊河水陡流急阻

回新河之水竝新建偏水壩一座新河悉已暢流
歸入大河又於海口外之石龍壩兩岸山腳俱新
築堤埂保障河基悉已堅固所需物料并人夫口
糧鹽菜等項合計銀五千六百三十餘兩臣已設
法辦理現今四州縣沿海沿河及近海口內外居
民既免淹沒并涸出膏腴田畝甚廣現在飭查另
冊具報此在省河道之大宗也至於四境之內河
道甚多條分派別各有源流而其最大者莫如盤

龍江由嵩明州卽甸里之黃龍冷水二洞及黑龍潭曲折三十餘里至省城東北盤繞於城之東南西三面至西北而入於海故曰盤龍江據委姚安府知府臧珊原任廣西臨桂縣革職知縣劉永濬查勘估報盤龍江修濬河身河尾礮砌石岸壩閘竝應增開各子河新築各堤岸應需物料人夫口糧鹽菜等項共估計銀三千二百三十餘兩其次如金陵河自元時咸陽王薩達克齊以郊田多水

少乃引盤龍江水於松華壩鑿河一道溉田甚廣
名為金陵河俗稱為金汁河據委永昌府同知甘
士琇昆陽州知州劉際平查勘估報金陵河自松
華壩至海尾約六十餘里應添修石岸及新開洩
水石閘二處需物料人夫口糧鹽菜等項共估銀
四千三百九十餘兩又次及銀稜河其源出於城
北二十餘里龍泉觀之黑龍潭會白龍潭水經商
山麓亦繞城東南曲折入海今開通子河竝岔河

分入盤江據委安寧州知州楊若椿查勘估報銀
稜河即銀汁河自黑龍潭至馬村通計上下流約
二十餘里蒜村一瓦水白龍寺文殊寺等閘竝兩
岸堤埂俱應加修需物料人夫口糧鹽菜等項共
銀四百一十六兩其次如寶象河在城南二十里
其源有二一自岢峩山小龍潭至板橋之東一自
黃龍潭至板橋之西於明陰寺前二水會流由官
渡以至海約八十餘里據委通海縣知縣臧在莘

元謀縣知縣樊好仁查勘寶象河至小板橋分為
三支一曰猓羅一曰官渡一曰舊門溪堤埂壩開
俱請酌量砌礮石岸加築高三四尺不等需物料
人夫口糧鹽菜等項共估銀一千一百四十餘兩
其次如海源河據委麗江府知府靳治岐查勘海
源河自海源寺至海約二十餘里兩岸土埂俱宜
寬修班莊上下暗洞竝沙河堤埂應修築高厚需
物料人夫口糧鹽菜等項共估銀二百五十餘兩

其次如馬料河據委署嵩明州知州張浩查勘馬料河自黃龍潭至海約七十餘里有白營村豬圈壩上壩溝清明溝以及橋梁二道除人夫照例外所需物料共估銀四百九十餘兩又次如明通河其河由三元石閘引注為金稜河之分派據委潞江府知府王鐸署晉寧州知州章倫查勘明通河自白沙橋至海尾三十餘里兩岸堤埂甚屬低矮河身窄狹應修寬券石橋二座砌過硿二處需物

料人夫口糧鹽菜等項共估銀四百一十餘兩又據委試用知縣以下羅仰錡查勘馬溺白沙二河其源來自放馬橋至海約二十餘里應請兩岸加高二三尺河身深寬三四尺需物料人夫口糧鹽菜等項共估銀五百二十餘兩以上各河共估銀一萬八百七十餘兩復經委布政司糧儲水利道親勘確核據報無異所有應需銀兩臣已於查出各項田地變價銀內動用令及時辦料興工另疏

題明外

臣

查海口六河竝各支河皆足以資灌溉而

備蓄洩獨因淤塞日久開濬少難以致水不注海
田僅通溝高地惟望雷鳴下區則憂雨積此稻糧
豐歉之故實人民苦樂所關如果山潤以水水艮
以山俾彼此相資互得其用則旱潦可為轉移荒
瘠早施補救人力既盡天必垂憐此臣之所以由
近及遠歷日積年務期通行成效勿敢怠忽勿敢
遺忘者也惟是既興工作宜定章程庶可以經久

而不致廢墜查雲南府原有水利同知昆明海竝
六河以及各支河巡查濬修是其職分應請鑄給
關防重其考成勤則獎叙惰則叅罰其昆陽州為
昆明下游海口在焉距省百里同知難以兼顧請
於昆陽州添設水利州同一員駐劄海口常行巡
察遇有壅塞不時疏通設或冲塌立即堵築亦請
鑄給關防照設書役以專責成至於通省各府州
縣皆有水利原無專員諉卸因循託辭藉口若將

同知通判州同州判經歷吏目縣丞典史等官加
以水利職銜凡境內河道溝渠責令專理除雲南
一府仍歸糧道管轄其餘各屬在迤東者統歸迤
東道管轄在迤西者統歸迤西道管轄仍令各該
府查勘驗報各該道考察詳明聽督撫二臣核酌
勸懲則不二三年將通省水利有興無廢而克濟
民生殊匪淺鮮矣抑臣更有請者昆明之六河昆
陽之海口及臨安之三河所關尤鉅歲修銀兩不

可不酌定查各項正款固不應擅那即各項盈餘亦未便濫費惟鹽道衙門歲有合秤銀一千五六百兩不等竝不在正額盈餘額外盈餘及各項積餘之內而鹽道張無咎絲毫無隱請即以此項撥作歲修之用昆明六河酌定八百兩昆陽海口酌定二百兩臨安三河酌定三百兩用則報銷仍造冊送部不用則存貯竝撥餘銀兩統數積存以備大修之需似於水利民生更有裨益除將通省水

利竝達川粵河道已竣未竣現勘加修各大略彙
叙

題明外所有修濬海口大修六河竝請定章程酌留

需費情由

臣

謹會同雲南撫臣張允隨合詞具

題伏祈

皇上睿鑒勅部查議施行

興修水利疏

鄂爾泰

為全滇水利已未興修彙叙陳明仰祈

睿鑒事竊惟地方水利為第一要務興廢攸係民生修

濬竝關

國計故無論湖海江河以及溝渠川澮或因勢疏導
或盡力開通大有大利小有小利皆未可畏難惜
費忽焉不講者況雲南跬步皆山田少地多憂旱
喜潦且竝無積蓄不通舟車設一遇愆陽即頓成
荒歲從前市米一石有價值十兩十五兩之前
事後鑒敢不預籌是以臣自蒞任以後仰體我

皇朝文獻通考卷之九十九
皇上愛民務本之至意即詳飭通查令凡有水利毋得
膜視并博採輿論合看繪圖務期矢此恒心用資
綿力但於治有小補庶幾慮可少寬志未嘗不如
此乃迄今六載雖亦次第舉行然興修已竣而獲
水之利者僅半已修未竣已竣未妥竝應修未修
委勘未確者居半現無成功何論久遠用深歉仄
切望羣材此應了未了事所當分晰開明陳請

聖鑒者也除昆陽海口及盤龍江諸河興修情由已另

疏具報外查雲南府屬嵩明州之楊林海又名嘉麗澤納龍巨南衝二河之水竝受四面山河各水會聚成淀出河口入車翁江達金沙江因河彎迂曲去水甚緩停留沙石壅塞咽喉每將海邊四十
八村已成田畝半行淹沒歷為民患臣詳加察訪海水深止二三尺若改疏河道由丁家屯龍喜村開挖二里許直通河口使新舊兩河竝瀉水勢暢流不獨四十八村可永免水滂而周圍五十餘里

草塘均可開墾成田隨於雍正五年秋委負會勘
竝先將歷年阻撓之衿棍二人枷示河干限以工
完釋放於是各士民懽呼踴躍情愿出夫僅資給
口糧竝未多費於雍正六年春報竣從此田畝歲
收竝涸出田地一萬餘畝再府屬宜良縣窪地多
淹高地無水旱澇不均有需調劑臣先於雍正七
年據前任知縣邢恭先詳稟飭諭興修隨於八年
春報竣續復委負覆勘所開河共五道一在城東

北五里五百戶營之南開長約五里已通池江一
在城東三里龍王廟北舊多積水開長約四里亦
瀉於池江一在龍王廟南為北來諸水所會開瀉
水河約十里水不為害一在城南二十里地名乾
墩子緣地無水池一望平行廢為棄土於池江邊
決一水門開河一道引肥水灌田現已獲濟惟自
江頭村起所開引河一道地形漸高水勢難上殊
無益灌溉徒費人工復議自胡家營北接舊河另

開一道約長五六里甚有裨益現飭於農隙興工
約明年春可竣又臨安府有瀘江一水來自石屏
州之異龍湖合塌沖象沖二水及六河九湍皆會
於瀘江以赴巖硿伏流十餘里出阿迷州入盤江
而硿口硿底石埂十三重阻水不能直瀉每遇夏
秋暴雨奔湍四潰田廬淹沒土人稱有神物憑巖
欲伐巖石輒有風霾砂石必中傷人經委前任知
府張無咎鑿石疏河椎鑿不能入強入不寸許旋

果風起砂飛礮礮從空擊下斷工人一指臣據報
謂神以庇民豈以虐民總制奉

天子命除患濟民而神弗許是神不靈隨通以誠告以
正遣張無咎以文祭畢復督工鑿石應手而碎十
三重立盡復將自瀘江至巖碕堤岸八百一十丈
自塌沖二河至三河口堤岸四千三百七十五丈
并造橋丁椿窆淺諸件一併築修於雍正八年四
月內報竣現已有利無害禾稻倍收再府屬之建

水州查自南莊十六營以下暨獅子口郭衣村等
八處田地甚多苦無活水但雨澤稍遲即秋成失
望前任知州祝宏以附近南莊之李浩寨山腹中
有過泉一道細流不息入地無踪曾竭力開挖不
能疏通稟報臣令以穀糠填入向下尋流約三十
里流出於州屬之老鼠窄知為此泉無疑遂穿鑿
地道伐木為廂穴中水湧勢甚湍激隨復開溝導
水儼成大渠竝酌定規條令挨次引灌而該地田

畝皆賴以豐收於雍正七年四月報竣府屬之阿
迷州離城里許有小河一道歷來不通舟楫該署
州漆扶助遵檄疏濬自水泉下遶州城由祿豐鄉
直達盤江計三十二里現可行舟於雍正七年八
月報竣府屬之蒙自縣有縣壩一區圍繞城外平
坦寬闊可成沃壤因灌溉無資遂棄為曠土查有
城南學海據壩上流亦經淤塞若濬深數尺建閘
築堤開溝引水即可以肥田雖工程不易舉而衆

願速成該知縣王廷諍於雍正七年興修八年冬
報竣又曲靖府屬之尋甸州城南平川沃壤皆可
墾土成田緣尋川一河會尋甸嵩明兩州之水每
夏秋積雨一望汪洋加以馬龍州河水又會於七
星橋下衝激尋川之水逆流氾濫即附近熟田亦
歲被淹沒土人謂自古相傳捍禦無策臣熟籌博
訪就其山形水勢及遠近高低欲使尋川河順流
直瀉必先使馬龍河不爭水道欲使馬龍河不爭

水道必須另開子河俾尋甸嵩明之水皆得暢流
並可免衝激不至氾濫今於雍正七年春面諭陞
任知州崔乃鏞查勘督修隨於是年十月興工八
年春報竣共用工三萬七千有零約可涸出田地
二萬餘畝但大河中流有整石四十餘丈務須開
鑿而施力殊難復議另濬沙河十五里以收全功
現委迤東道遲維璽就近督修又濬江府城南之
撫仙湖延袤百餘里中流深處可百餘丈以受各

山之水亦名為海由寧州入阿迷注盤江會流以達粵境每雨多水沙宣洩不及則附郭之河陽竝江川寧州三處利害共之惟海口一河尚堪疏洩而山溪水漲推砂滾石壅積易而通暢難明巡按姜思睿曾建牛舌梅子箐二壩撼兩山之衝激遏砂石之壅淤今石壩傾頽更無可恃據該知府王鐸詳請興修臣隨發銀委辦計石工一百七十六丈零首尾寬深堤壩堅固又增築逼水壩六墩以

固石壩以滌岸砂於雍正八年興工九年六月報竣河陽田新涸出三千餘畝舊田遍種現獲豐收又楚雄府屬之鎮南州舊有水塘築堤積水以資灌溉名千家壩因傾廢百年水無停蓄一遇亢旱種插竝難臣面諭該知州金鑑確勘詳覆其水來自北山龍王廟及多巖殿等處兩旁坡巖壁立四季泉源不竭會流箐口兩山迴環儼如門扇基址天成蓄水成塘可灌數十里田畝隨發給銀兩令

築壩建閘全用大石并將外口開挖寬深毋得省
工惜費於雍正八年六月興工掘出千家壩舊碑
一版復指其缺略示以堅完於九年三月報竣據
稱不獨可灌千家并可以周萬戶矣又東川府雖
倚山臨川不通河道種稻田者無多餘半為荒土
而城北蔓海一區寬長二十餘里地本肥饒因積
水難消棄置已久自割歸滇轄臣經發銀數千兩
令前任知府黃士傑於雍正五年開河三道一從

馬五寨至魚洞二十里為左河一從瓦泥寨至水城二十里為中河一從拖落村至魚洞二十里為右河建石閘二座木橋四座水消田出業招民承墾劾守羅得彥又從馬鞍山開河一道約長十里以濟蔓海從梅子箐開河一道約長十里會合中河及知府崔乃鏞接任於九年正月加修旋據報竣其餘如嵩明州之寬郎河效古日足二里田畝同資灌溉因分水不均里民爭控飭令開子河一

道俾兩里均平九年四月報竣宣威州舊少水田
僅資蕎麥知州漆扶助於雙龍山泉會合處建石
閘一座於戈山河口建石壩一座左右各開渠一
道於嘉惠落水洞旁建石壩一座開渠一道截流
引水均可墾田俱於九年八月報竣祿勸州地僻
土寒穀難成熟惟正東東南等村可以種稻內有
馬家莊等處田高缺水舊有水溝一道久經壅塞
前任知州賈秉臣請從山腰紆折鑿石成渠匯復

溝水可灌田數千餘畝於雍正四年八月內發價
飭修不數月報竣大理府洱海之海口為附郭之
太和及趙州鄧川三州縣水利所關因壅塞多年
每遇雨水泛濫海田多傷據前任同知佟世蔭等
詳明興修水得暢流田禾攸賴於雍正四年內報
竣又雲南縣有團山一壩舊立閘三道引梁王山
泉灌溉田畝歲久傾圯難資引灌因開修溝閘並
濬清海尾赤河尾業經報竣浪穹縣因湖水氾濫

疏濬鳳羽河等處築堤四十餘丈廂木櫃五十架
業經報竣但補苴一時尚非遠計現復委勘加修
永昌府城外有南北兩河田畝攸賴因壅塞已久
歲損禾苗據該鎮府等倡率兵民用夫一萬餘亦
於雍正四年內報竣以上各件工有大小時有遲
速或給發承修或騰那濟事或奉行官吏加意急
公或本地士民出夫協力竝未動項皆已完工內
有仍需加修者亦不過增補其各屬地方如堤壩

圩埂溝洞渠塘等類隨時疏築各有稟詳事件零星俱無庸開叙此外如臨安之建水石屏俱受廬子溝之患嵎峨之城垣田廬俱受練江猊江之患曲靖之西瀟湘南寧之落水洞羅平之西北一河新興之玉溪路南之蜡甸和曲之紅土田趙州之彌渡雲南縣之馬安鄧川之苴彌浪穹之寧湖皆應疏濬開鑿俾有利無害祿豐縣之宜重修廢橋定邊縣河之宜建石堤永北府之羊保山宜建石

壩順寧府河之宜建鐵索橋皆應乘時料理庶力少功多至於通粵河道最關緊要非止便客商實欲資糧運臣於雍正七年春即發銀飭修已由阿迷州以下開至八達共一千五百里造船試行直至土黃有旱路二站亦經置備車牛竝蓋棚店下船至剝隘則徑達粵江因委總理之被劾原任廣南府知府賈秉臣草率粉飾竝未徹底開通故雖勉強行舟河路尚屬危險現復委負確勘妥議增

修又嵩明州之河口經尋甸東川由牛欄江達金沙江周環川江復抵昭通以通舟楫雖工程不易亦人力所能現委試用知縣以下趙世綸等備細估勘繪圖覆奪若得川粵江河舟通滇會則片帆可達吳楚又不止尋常水利事矣以上各件臣已切囑司道竝詳諭各官實心措辦所需工費請於變價銀兩內酌量動支敢或藉端侵冒及苟且塞責者立即揭叅以為膜視公事者戒惟衆志若一

期在必行庶百務無難皆克有濟且各為地方貽
永遠利賴之善蹟以仰副我

皇上厯念邊方之盛心亦所以自求福而與有榮幸事
也所有全滇水利已未興修彙叙陳明緣由相應
會同雲南撫臣張允隨合詞

題明伏乞

皇上睿鑒勅部查照施行

委負赴昭辦理開墾疏

署三省
總督 高其倬

見前

為報明動項委負開墾昭通田畝仰祈

睿鑒事竊照昭通地方新經綏靖兵糧民食俱關緊要
昭通田土肥腴宜於稼穡開墾一事實為先務業
經督臣鄂爾泰創始料理瀕行諄諄以尚未竟其
事為臣言之臣查昭通一郡四面環山兵米自外
州縣運往轉輸不易若本地耕獲有資於軍糧甚
便且田疇漸廣則民戶日增可以填實地方可以
移易課習事屬有益既不可緩而轉瞬春耕時又

將屆臣隨一一酌指檄令布政司葛森糧儲道黃士傑議詳商同撫臣張允隨批定并遴委楚雄府知府儲之盤帶領候補府州之顧維鑄錢煌學習進士黃士鑑試用胡珣前往昭通專辦墾務令昭通府廳縣亦行協同辦理又令附近昭通之尋甸等各州縣招募習於耕種之農民一千戶限於正月二十日以内到昭令委負儲之盤等將昭通所有之田詳細查看分為水旱生熟四項凡其處水

道田塍俱皆現成曾經種過稻穀而現今拋荒者此種之田用力少而成功速當年墾種即可收成令作為熟水田其地有水可引宜種稻穀而從未經種者作為生水田至於只可種植雜糧不能開為水田者作為旱田亦分生熟二項俱令一一查明除今年已招墾之七百餘戶仍令將原墾之田照舊給令耕種外其餘田土俟新招墾戶到昭之時每人給以田二十畝此給田之處先儘熟水田

給墾熟水田給完再儘生水田給墾生水田又完
然後以旱田給墾但旱田歷來墾戶種者居多又
須將旱田之附近新經安插之墾民住處者先儘
給墾民餘剩者給墾戶耕種其兵民從前已給田
今凡兵戶現實有人墾種者亦令每戶給以二十
畝令其種植所給與兵民墾戶之田俱令於分給
之始即立清界限以杜將來紛爭影射之葛藤其
田按年陸續收其稻穀照時價計算扣還工本扣

清之後即令起科納賦納賦之處仍即令輸米以
供兵食以省運費其田給與執照永遠為業至招
往之墾戶臣查自各州縣前往招通道路崎嶇今
天時正值寒冷之際沿途食物稍貴臣又酌量計
其在途之時每墾戶每站大口給銀五分小口給
銀三分俾添買柴火食物使之踴躍前往爭先應
募不悞春時墾耕之期再昭通又有一種土人類
於熟苗向來昭通徠人多不種稻皆令此種人為

其佃戶納租供食其人勤於耕種性甚淳良今已
不屬獮戶正可資以力田在彼既喜於安業在官
又可省多費臣亦令辦墾各負酌量給田令墾照
民納穀總之此開墾之事田畝分定之後即令辦
負分往田間朝夕看視勸戒以分墾戶之勤惰臣
亦不時查察以考辦官之勤惰務期於來年二月
之內一例開耕儘力墾種期於秋成之後所收穀
石即有益於當年之兵食所有赴昭辦理數負臣

亦酌量給與日用盤費此開墾各項之用約需一
萬數千兩臣先請於開墾捐納項內動用俟墾戶
陸續按年扣還原數其項款細數難以預計容臣辦
定造報具

題送部查核臣謹先將委負開墾昭通田地動項辦
理緣由會同雲南巡撫臣張允隨合詞

題明伏乞

皇上睿鑒勅部查照施行

酌籌滇省糧賦疏

巡撫 張允隨 奉天

竊查滇省各府州縣兵多米少之處輓運維艱兵少米多地方米難久貯俱應實心籌畫因時變通務期兵民有益臣先經與司道再四斟酌并行令妥議去後茲據布政使葛森會同署糧儲道黃士傑詳稱查滇省額徵民屯稅秋米石共二十一萬九千石四斗七升零額設制兵共四萬七千九百八十八名歲需銀八十六萬九百四十一兩六錢零

歲需米一十七萬二百七十二石八斗零以額米
供支外尚餘米四萬八千七百二十七石六斗七
升零以制兵通盤計算米則支放有餘但駐防兵
多之各府州縣所徵稅秋糧米不足供支應將徵
條銀通融折收糧米以資軍食駐防兵少之各屬
所收糧米足以供支仍應照舊輸納米多兵少之
各屬將糧米折解以抵兵餉民免輓運之勞米無
紅朽之虞昆明縣附居省會駐扎重兵人烟輻輳

日食浩繁所徵糧米雖不足搭放應仍將附近各州縣糧米運省供支毋庸議改其廣西廣南鶴慶永昌永北曲靖尋甸羅平南寧太和南安鎮雄保山新平文山會澤等府州縣俱駐有官兵除將各該府州縣額徵稅秋糧米搭放外仍有不敷會計撥運採買不免滋擾請將廣西等十六府州縣所徵條編銀兩內除軍舍丁差并差發馬場魚課照舊徵收及存留錢三俸工應於各府州縣中最遠

之里分輸納銀兩外尚該銀二萬一千七百九十
六兩零照數全折請以每銀一兩折收京斗米一
石徵貯各該本倉備放少有不敷亦撥運無多至
米多兵少及無兵之阿迷寧州路南雲龍雲州鎮
南通海蒙自永平姚安元謀等十一府州縣額徵
秋米全數折收并蒙化府雲南大姚二縣額米改
半折收二共米二萬五千七百六十六石零請以
每米一石折銀一兩撥抵廣西等府州縣條銀二

萬一千七百九十六兩零解司充餉外尚餘銀三
千九百七十兩有奇應貯道庫照以一兩折給普
洱鎮兵糧安寧晉寧呈貢昆陽宜良富民河陽新
興江川等九州縣稅秋糧米俱撥運省倉支放石
屏州額米撥運臨安府倉十二關額米撥運大理
府倉嵩明宣威霑益馬龍平彝邱北彌勒臨安建
水甯我元江恩樂趙州賓川鄧川浪穹劍川騰越
順寧楚雄廣通景東麗江武定和曲祿豐師宗河

西等二十八府州縣雖各駐有兵以各處所徵糧
米搭放并協運鄰倉供支所徵條銀毋庸改折又
麗江邱北之新墾建水之猛弄新增米石係屬夷
糧永行折徵業於奏銷冊內登明毋庸另議至昭
通永善駐有重兵額米不敷搭放經署三省總督
高其倬會

題動支司庫銀兩委負赴川採買輓運接濟條銀毋
庸改米維西營分防之阿墩浪滄二汛兵米不敷

題明以二兩一石動支司庫正項折給條銀毋庸改
折至維西額米不敷兵食原係酌撥鶴慶麗江倉
米加給腳價運供除三站不給腳價外每年約需
腳價銀一千二百兩有奇向於報部輕齎盈餘銀
內動支今停止輕齎應於司庫備公銀內動給再
普洱攸樂威遠鎮沅等各駐有兵額米不敷支放
別無附近可撥今以銀一兩折給不敷買食又當
量為加增但無項可動今查有永行折徵之易門

祿豐羅次定遠并裁歸蒙化之定邊等歷係以米
一石折銀八錢徵解茲各屬既以每米一石折銀
一兩亦應照以一兩徵收內除題定之八錢解
司充餉外所餘二錢通計該銀一千七百五十餘
兩作為加添普洱鎮兵丁折給不敷之用至中甸
駐防兵丁每年需米一千八十石內除額徵米七
百三十三石零不敷米三百四十七石零查該倉
節年存米足供四年之用應於舊存米內添撥動

支後有不足另行酌議詳請再查道庫尚存節年
輕齎銀一萬五千九百八十八兩零請於本年採
買供支以癸丑年為始停止採買仍每年將改米
改折府州縣於奏銷冊內分晰登造詳請

題達計倉儲之盈絀因時變通不以為額總期於
國計民生均有裨益相應合疏具

題

籌酌普思元新善後事宜疏

尹繼善

見前

為敬陳邊地垂久事宜仰祈

睿鑒事竊照普思元新一帶自雍正十年逆夷悖叛擾
害邊疆仰蒙

皇上天威遠播訓示周詳選將調兵嚴搜痛勦人民咸
得安堵地方悉已敕寧經臣具疏

題報在案但邊境險遠界連外域處處深山密箐在
在蠢猥頑苗撫綏固應詳籌防範尤當嚴密一切
營汛建制事宜亟須乘此平定之後以為一勞永

逸之圖臣與撫提諸臣悉心商酌因地制宜量為
增改逐條臚列為我

皇上陳之

一攸樂營汎官兵宜移駐思茅也安營設兵務期有
用天時地利均要得宜查攸樂為普鎮右營孤懸
瘴地僻處萬山水泉微細食用艱難兵丁多係單
身最易逃走人人視為畏途更難招募自攸樂至
思茅相距甚遠在在深山險箐塘汎兵孤勢難存

立一遇有事聲氣隔絕思普之兵不能及時應援
即太平無事而烟瘴甚盛水土惡劣兵丁多致傷
損其存活者亦皆疾病纏綿筋力疲弱難以彈壓
地方臣在京時荷蒙

聖諭令將三省事宜與大學士鄂爾泰悉心商酌鄂爾
泰即以攸樂營基未妥囑臣另籌臣細查形勢與

撫提諸臣再四斟酌攸樂一營必須改移雖前經
同知郭倫議詳改建於攸樂箐口已據報完城工

五分旋遭兵火究之與攸樂相去不遠烟瘴亦盛
終非長策查思茅地方高爽水土和平北接普威
南控江壩實為形勢之要自宜將攸樂一營撤歸
思茅將右營遊擊移駐統領竝將攸樂同知亦移
駐思茅與遊擊同城改為思茅同知換給關防將
思茅通判一缺裁汰車里江外各猛地方係宣慰
司管理所有錢糧責成徵解其攸樂茶山一帶總
屬同知管轄錢糧俱隸徵收庶控制得宜兵民均

有裨益

一普洱郡城宜添知縣一員以資治理也普洱居滇省極邊之地幅負甚廣料理需人原設知府一員事無巨細俱係知府管理雖設有經歷僅可備供差遣知府遇公事出竝無印官在城或遇緩急別無一員幫助非所以重地方也應添設知縣一員駐劄府城所有倉庫錢糧戶婚田土監獄事務悉歸經管再添典史一員以備任使知府得有餘力

專司總理庶佐理分任各有其人彼此相資緩急有賴至新設之縣仰請

欽定佳名鑄給印信以重職守

一普鎮三營兵丁宜酌添也普洱全境縱橫綿亘約計六七十里額兵二千四百名除親丁公費及分佈塘汛外存城之兵甚少前歲猱賊猖肆兵力單弱守戰不能兼顧及調兩迤官兵遠路奔馳而賊勢蔓延地方已遭荼毒是設兵不足猶之乎無兵

也但增兵太多又慮山路險遠糧運維艱今再四斟酌每營必須添兵一百連原額計算每營各九百名三營共二千七百名庶極邊遼闊之地可以守禦有資矣

一三營汎地宜籌酌妥當也查普鎮中營原設等角通關哨兩大汎左營原設抱母鎮沅新撫恩樂四大汎右營原設猛旺思茅兩大汎又中營原設整董一小汎左營原設猛班三圈二小汎右營原設

猛旺倚邦猛烏慢林猛養五小汎凡小汎兵丁每處或四五十名或二三十名離營寫遠散碎零星平日徒作踐夷人有事即先遭殘害汎多分小汎大營兵單欲調動則前出後空欲分應則顧此失彼前車之鑒歷歷可指是兵勢散而無濟不如合而可恃也應將三營之整董等小汎一併撤歸大營以壯聲威以收實用至於三營大汎又有當詳加斟酌者中營通關哨一汎界在把邊阿墨兩江

之中實係元普咽喉應撥中營守備一員把總一員外委把總一員帶兵二百名駐劄又把邊渡口亦關緊要應於通關哨兵內撥出外委把總一員帶兵五十名駐劄遊巡江崖等角一汛接壤元界之里仙江實係夷獍出沒之地應撥外委把總一員帶兵五十名駐防此外尚有兵六百五十名遊擊一員千總二員把總三員外委千把四員隨總兵駐劄普城又左營遊擊原駐威遠守備分駐鎮

沅今查威遠地方烟瘴甚盛鎮沅為適中之地風俗強悍較威遠緊要應將遊擊移駐鎮沅與知府同城以千總一員把總一員外委千把二員兵三百名隨遊擊駐劄以把總一員外委把總一員帶兵一百名駐防恩樂內抽撥三十名令外委把總帶領分駐三家坡防守以把總一員外委把總一員帶兵一百名駐防新撫內以隊目一名帶兵十名於界牌安哨稽查其威遠地方以左營守備一

負把總一員外委把總一員帶兵二百五十名駐防內以把總一員帶兵一百名分防抱母井其左營原貼防攸樂兵丁一百五十名令千總一員外委千總一員帶領隨總兵駐劄普城又右營原駐攸樂今擬撤歸思茅應令遊擊一員千總二員把總二員外委千把四員帶兵五百名駐劄思茅查猛旺一汛距思茅二百里若原有攸樂一營自宜於此處設汛以聯聲勢今攸樂既撤則猛旺亦可

不必設兵惟由普藤猛旺茶山直抵九龍江一路
飭令各土弁沿途按站設立土塘遞送公文又班
鳩坡係思普咽喉應撥把總一員外委把總一員
帶兵一百名駐劄班鳩坡保固道路此外尚餘兵
三百名令右營守備竝把總一員外委千總一員
帶領隨總兵駐劄普城統計總兵帶遊擊一員守
備一員千總三員把總四員外委六員馬步兵一
千一百名駐劄普城則官負兵丁力量充足無事

可以壯聲威有事可以供調遣仍令各營汎備弁
每月撥兵五十名於連界各路彼此會哨一次換
旗巡防不許騷擾多事庶營勢謹嚴兵力整齊可
以緩急足恃矣

一普洱地方遼闊宜慎選土弁管束以專責成也民
人錯居皆有鄉保約束夷獮雜處務須土目稽察
內地之土目必當削其事權而邊境之土目又必
使有專責查江外各猛地方已有宣慰司刀紹文

及土弁刀細悶納保守以為藩籬雍正十年逆夷
蠢動江內江外到處煽惑是時刀紹文年尚幼穉
未經承襲紹文之母刀氏同土弁刀細悶納力拒
妖言率衆堵剿辦理糧運保固江防實屬深明大
義懋著勤勞仰懇

聖恩應否比照烏蒙案內隴慶侯之庶母二祿氏四川
沙罵土司沙氏之例給與封典竝賞給刀細悶納
土守備職銜以昭獎勵至江內之六版納及茶山

整董烏得白馬山六困一帶幅員遼闊山深箐大
且烟瘴甚盛既不能處處設兵在在置官若不令
土目分管漫無責成地方難以寧謐今通盤籌畫
除猛烏易武小猛養舊有土弁召匾乍虎叭干無
容另議外查普藤土千總刀猛比深明大義始終
效順隨師搜勦歷著勤勞應賞以土守備職銜將
猛旺及糯竜等二十四村賽責令管理其茶山倚
邦一帶均係窩泥查有倚邦土弁曹當齋為人誠

實隨師勦賊勤勞素著應將倚邦茶山責令管轄
整董亦屬扼要之區自土弁召第於叛案內拿解
地方無人鈐束查有土目召音隨師奮勇甚屬出
力應給土把總職銜管理整董再猛腊地處極邊
與外域接壤最為緊要彼地頭人召糯極力堵禦
辦運軍糧甚屬急公効順應賞給土千總職銜以
示獎勵責令保守邊境至白馬山六困整控一帶
原係土弁刀輔國管理查伊兄刀興國不法律應

連坐但興國謀叛輔國實不知情一聞蠢動即報
思茅文武協同守城又著伊妻防護倉糧以資兵
食後經發往効力贖罪輔國奮不顧身實心出力
擒獲賊首竝將白馬山一帶夷民全數招安甚有
功績應賞還土千總職銜仍令管理地方必能格
外感恩以圖報効再攸樂營汎既撤其三十六寨
需人管約據宣慰司刀紹文及各土弁公保以竜
損管理窩泥寨喇鮓區分管蒲蠻寨俱皆誠實可

用宜令管理其餘八目火頭俱擇勤慎老實者分
派充應仍不時嚴加稽察果能實心効力自當酌
加獎賞如有多事滋擾即當拿究另行更換此竝
非以久經歸流之地而反責成土目蓋地方總係
流官管轄土目不過分查地方惟以土目管土人
仍以流官管土目庶窮山僻壤瘴癘險阻之區莫
不各有責成各有約束地方文武止須提綱挈領
彈壓撫綏則事不煩而民不擾似亦治理邊夷之

要道也

一普洱府治宜改建石城也普郡地處極邊接壤外
域實中外之咽喉滇南之門戶既設鎮府必資城
郭現在雖有土城一座但土性浮鬆一經淋雨易
於傾塌殊非久遠鞏固之計且易啟蠢類覬覦之
心應請改造石城方足建威消萌其思茅土城應
再修葺堅固竝於四面添築炮臺鎮沅城垣亦日
久圯塌應一併修築則捍禦有資邊疆永賴矣

一官負販賣私茶兵役入山擾累之弊宜嚴定處分也思茅茶山地方瘠薄不產米穀夷人窮苦惟藉茶葉養生無如文武各負每歲二三月間即差兵役入山採取任意作踐短價強買四處販賣濫派人夫沿途運送是小民養命之源竟成官負兵役射利之藪夷民甚為受累前經陞任督臣鄂爾泰題明禁止兵役不許入山臣等又將官販私茶嚴行查禁但不嚴定處分弊累不能永除請嗣後責成

思茅文武互相稽查如有官負販茶圖利以及兵役入山滋擾者許彼此據實稟報如有徇隱一經察出除本負及兵役嚴叅治罪外竝將徇隱之同城文武及失察之總兵知府照苗疆文武互相稽查例分別議處庶官負兵役不敢奪夷人之利而窮黎得以安生矣

一攸樂一帶之鹽課宜寬免也查磨者烏得整董猛烏四鹽井皆在極邊瘴癘之鄉與普洱府治相隔

甚遠春夏水發味淡惟秋冬可以煎鹽為數有限
附近山多箐密夷人罕事耕種專藉此鹽零星負
賣易米資生雍正七年間於籌畫普洱建置事宜
案內

題請添設大使二員駐劄猛烏整董督煎辦課仍以
瘴盛不能往井將大使裁撤令夷人認課銀二千
兩自夷人認課之後獲利輕微生計不贍雍正十
年間逆夷叛擾塞井毀竈附近諸夷奔逃四散井

地一空是以雍正十年十一年分課銀無出經撫

臣張允隨會

題請免現據鹽道張無咎具詳設法招徠尚在畏懼
不前無人煎辦臣思課額虛懸總於

國帑無益錢糧有限不如恤惠窮夷仰懇

聖恩將原定認納課銀特賜豁免除仍賞夷人煎售庶各
安心復業而兵火之餘得以生計有賴矣

一就近歸併村寨以便管轄也地方界限最宜劃清

若隔裂寫遠勢必稽察難周如元屬善政里猪山者鬼布林腊猛三鄉及上下猛緬猛松左戛又惠遠里之磨舖薩等糯那阿扇那補怕南害等寨地近普攸距元十站二十站不等相隔遙遠難以管轄應將前項村寨歸併普洱管轄仍選委土弁目就近分管又查元屬惠遠里之西薩猛列地方離元江五百餘里去威遠甚近應改屬威遠管轄又有鎮沅府屬之壩朗壩木壩痴三寨去鎮沅九站

去元城止二百里應割歸元江管轄不但稽查甚便即一切上納錢糧充應夫役不致有遠路奔走之苦矣

一威遠宜歸鎮沅管轄也查鎮沅一府戶口無多止轄恩樂一縣事務簡少威遠附近鎮沅向設同知一員經歷一員不隸府轄聲勢殊不聯絡應將威遠地方改歸鎮沅府管轄原設之同知改作鎮沅府分防威遠撫夷清餉同知一切刑名錢穀事務

照大關同知之例仍令辦理由府稽察核轉換給
關防以昭信守其原設經歷一員應行裁去改作
鎮沅府知事一員仍隨同知駐劄威遠以供任使
一應養廉役食衙署等項俱應仍舊毋庸增減其
威遠生童向附元江府學今威遠既議改歸鎮沅
應將附入元江府之生員歸入鎮沅府學嗣後生
童俱歸入鎮沅府學考試以廣造就再鎮沅府屬
之新撫地方為元普咽喉自恩樂至普洱中隔六

跣運糧解犯往來必經必需專負料理應請設新
撫司巡檢一員鑄給印記駐劄新撫稽察逃盜賭
博專司巡緝及往來運解事務庶佐理統轄各有
責成治理得收實效矣

一元江營制宜酌量增改也查元江四面夷疆幅員
遼闊實屬居中扼要之所從前設遊擊一員兵丁
八百名營制單弱汎地零星難資控制茲當地方
大定之後自應亟為籌畫以期永固邊圉請將該

營遊擊裁去改設叅將一員添設守備一員把總二員兵丁四百名拔外委把總二員同原設之守備一員千把總六員外委千把總六員兵丁八百名分為左右二軍仍隸臨元鎮兼轄其叅將一員帶左軍守備一員把總二員外委千把三員兵丁五百名駐劄元江府城防守彈壓分佈塘卡他郎地方乃元普鎮威通衢實屬要區原經建城設汛但汛兵單弱今應以右軍守備一員帶把總一員

外委把總二員兵丁三百名與他卽通判同城駐
劄又阿墨江口乃元普咽喉應以把總一員帶兵
五十名防守渡口與他卽通關哨相為連絡又因
遠地方甚為阨要應以外委千總一員帶兵五十
名防守與他卽大汎相為犄角又邦轟一汎路通
元新應以千總一員外委把總一員帶兵一百名
防守內以外委把總一員帶兵三十名分防谷麻
江渡口又老烏山為元新等處出入要隘應以把

總一員帶兵五十名駐防內以隊目一名帶兵十名輪流更換稽察南戛渡口又馬鹿塘乃省會咽喉為揚武壩青龍廠適中之地應以把總一員帶兵五十名防守又永豐里之豬街地方四面通達甚屬緊要應以千總一員外委把總一員帶兵一百名防守竝令不時酌撥兵丁於壩罕一帶遊巡稽察其各汛應設塘卡各令照界安設仍令各照地界按期遊巡會哨則佈置謹嚴聲勢連絡庶無

零星單弱之虞其原設之土戛汎瘴癘甚盛難以
駐兵界牌新寨歸普洱鎮設汎防守白土坎相去
豬街不遠壩罕汎亦與豬街連絡磨沙河與老烏
山聲息相通均毋庸設汎又元城長亘臨江無險
可恃應於東南各築砲臺一座西北各築砲臺二
座以施鎗砲其他卽城已新築砲臺素無大砲查
於敬獻菊言等事案內業將省城存局得勝發貢
大砲酌撥八位分發元江今應令存貯元城四位

分貯他卽四位庶資守禦

一新平官兵防汛亦宜增改以資彈壓也新平一縣
界在萬山內控魯魁外連哀牢地廣兵單夷獍兇
悍最為緊要查新舊營原設叅將一員守備一員
千總二員把總四員外委千總二員外委把總四
員兵丁一千名實屬不敷且存城兵丁僅止一百
八十餘名更為單薄應酌添兵丁二百名把總二
員同原設把總分為頭二三司竝照拔外委把總

二負仍隸臨元鎮兼轄以叅將一負帶守備一負
把總二負兵丁四百名駐劄縣城居中彈壓其縣
屬之腳底母地方為元新門戶野賊出沒之所應
以把總一負帶兵五十名駐劄與元新各汛彼此
連絡又舍疊龍一汛在哀牢半山甚為緊要應撥
把總一負帶兵丁一百名駐劄防守又錯納賈一
汛向係猺賊出沒小徑應撥外委把總一負帶兵
五十名駐劄又漫干壩一汛為恩樂太和廠斗門

鄉出入門戶且與從前各獮賊舊巢緊接實屬要區應撥千總一員外委把總一員兵丁一百五十名駐劄防守內撥兵丁三十名以隊目帶領前往太和廠分防巡哨以衛廠民又舊哈一汛居哀牢要區且與楚姚之界牌汎相為表裏應撥把總一員外委把總一員帶兵一百名防守又揚武壩一汛駐劄魯魁山底甚為緊要應撥兵一百名令把總一員外委把總一員帶領防守又曹義縣城原

設千總一員外委千總一員帶兵一百名防守今
應照舊又塔竜一汛接壤丁癸二鄉竝易門之馬
頭等處最是藏奸應撥外委把總一員帶兵五十
名駐防又化念一汛係新平魯魁門戶應撥外委
千總一員帶兵五十名防守又俄夾一區為魯魁
出入小徑與臨安石屏河西曲江等處相通地既
偏僻又無營汛故從前野賊得以任意往來應撥
外委把總一員帶兵五十名駐劄堵截其原設之

新化州樹哺拉灑沖亞泥壩黑泥哨歇塔圖等汛
均可不設庶汛地皆居扼要足資防禦而亦無零
星單弱之虞矣

一元新土目宜禁止擅管地方以杜擾累也查元江
新平均屬內地凡稽察村寨約束夷戶俱應地方
官自行經理非同普洱邊方僻遠必須設立土目
以資稽察乃元新村寨向被各土目私行霸佔有
某處屬某土目項下名色分疆劃界竟成世業以

致不法土目科派索保恃強欺弱無所不至夷民
畏其威勢莫不羣聽指使有呼輒應及前歲野賊
猖肆各土目項下之人又多附和隨從彼此推委
不能約束若不亟為清理不特夷民世受苦累兼
恐因循日久漸難鉗制應嚴禁各土備弁目以後
不許霸佔村寨一切稽察約束事務俱令地方官
管理不許仍存某人項下名色各村寨原有火頭
即如內地鄉保應令文武地方官會同查明務擇

誠實守法者充當應更換者更換其土備弁目只令聽候地方官差遣調用不許向各村寨一毫滋擾如各土備弁兵仍有霸佔村寨擅行索保私養後生仇殺生事及藏匿盜賊玩法為匪者即嚴拿正法地方官徇縱失察

題叅議處如各土備弁目果能安分守法毫不多事差遣無悞盡心効力者於年底令地方官核實具報分別獎賞庶夷民得安耕鑿永沐

國家休養生息之宏仁而土目削其事權亦免尾大
不掉之後慮矣再元江府城原設漢捕六名此輩
需索滋擾實屬朘民之蠹應行裁革以靖地方

一調用鄉練宜用文武印牌也查土練皆係百姓竝
非土目私人非奉官調不應擅動歷年調用土練
大抵土目自傳木刻者俱多行之日久恐正偽不
分姦徒易於鼓惑應請嗣後調練務以地方文武
會銜印牌為憑不許土目擅自私調竝通行曉諭

大小村寨鄉管頭人如有土目不奉印牌以木刻小票擅調鄉練即赴文武衙門具報以憑嚴拿照擅調官軍律治罪如鄉管火頭通同隱匿一併究處地方文武失於覺察竝行叅究則土弁目無權可操實屬防範之要道也

一臨安府屬石屏州之寶秀地方宜築土城以資捍衛也寶秀界連元新為臨屬咽喉裸賊出沒要區前歲逆夷悖叛先遭蹂躪應於寶秀築土城一座

於扼要之處設立砲臺撥給砲位以資守禦又寶秀向於臨元鎮標撥把總一員帶兵五十名駐劄未免單弱應於該鎮標內添撥兵五十名共一百名令千總一員外委一員帶領駐防則寶秀可獲安堵即臨安石屏亦皆資捍禦矣

一防汛要地宜籌捍衛也查普思元新形勢遼闊設汛之處大抵離城寫遠地居扼要若止撥兵駐劄而不設險防範猝遇有警汛兵多者百餘少者數

十不比大營究屬單弱難以守禦應於現議設汎處所擇其尤關緊要者或築土堡或建木城汎兵駐劄其內庶防守有資賊人不敢覬覦其各塘汎弁兵應近則按季一換遠則半年一換以免攜帶眷口之累且勞逸得均可以輪流操演至增兵設汎各處均宜建造衙署營房以供棲止統俟委負同前議應建應修城垣砲臺一併確勘估計詳核另

題

以上一十六條就臣等愚昧之見斟酌調劑以副
我

皇上慎重邊疆奠安黎庶之至意其普洱一鎮元江新
甯兩營現添兵丁共九百名應照馬一步九添設
但各標鎮協營額兵均難抽撥而悉行招募又多
糜費臣等悉心籌酌查滇省督臣衙門向有隨丁
名糧一百分撫臣衙門向有隨丁名糧八十分經

前督臣鄂

奏明在案今軍務全竣賞費無多臣等養廉儘足敷

用應按照營制將臣標隨丁內撥出馬二步八兵

餉一百分撫臣親標隨丁內撥出馬一步九兵餉

八十分以充普洱等處新添兵餉又查雲南奇兵

營原設馬兵一百八十名步兵四百八十名守兵

三百四十名與滇省各營馬一步九之制不符且

滇省跬步皆山無需多用馬匹應將奇兵營照例

改作馬一步四守五營制其減出餉乾銀兩亦撥
作新添兵餉是雖有減撥之名營伍仍係充實錢
糧又可節省其餘不足之數另行招添合併陳明
是否有當臣謹會同雲南巡撫臣張允隨雲南提
督臣蔡成貴合詞具

題伏乞

皇上睿鑒勅部議覆施行

社倉條奏

陳弘謀見前

奏為酌通社倉借本以資接濟事竊照社倉之積貯
原備民間之緩急必使逐年漸增斯可廣行接濟
我

皇上厯念民依洞悉利弊惟恐奉行不善致滋派累

特頒訓旨誥誡周詳

臣仰體

聖懷於滇省社倉悉心籌畫實力勸捐惟期積少成多
庶幾有備無患祇因土田瘠薄出產無多所捐終
屬有限自奉行至今通計一省捐積穀麥等項止


有七萬餘石其中一千石以上者僅二十餘處此外皆數百石數十石亦有全無社穀者每遇缺乏籽種青黃不接之時吏徠窮民無處借貸漢姦劣紳乘機盤剝重疊科算最為民害雖嚴行示禁而民間緩急之需終不能免是滇省社穀尤宜多貯而捐輸既不能多所宜另籌增添者也臣查各屬俱有常平倉及官莊等穀除每年存七糶三外存貯尚多可以酌量暫撥以作社本除舊有社本一

千石以上已敷接濟毋庸議外其未及一千石者均於該處常平官莊等穀內動撥五百石或八百石作為社本令社長一體經管出借窮民秋成照例加一陞息歸於社倉項下積貯庶各屬社穀均可由此漸增而地方窮民每年得此輕息之穀以供籽種免重利盤剝之害所納加一之息仍積存以為該地緩急接濟俟積有一千石社本仍將原動常平等穀歸還本款一轉移間似於倉儲民生

兩有裨益臣為邊方積貯起見用敢繕摺奏請伏

祈

皇上訓示臣謹奏



雲南通志卷二十九之六